

Disclaimer:

**Arshad Basheer madani ke urdu books ko
Roman English mai lane wale ahabab
Mubarakbadi ke mustahiq hai
ke unoun ne asan kia urdu reading Na janne
Waloun ke liye**

الحمد لله

فجزاكم هلا خيرا

**Note : arshad basheer madani ne Word to
Word check nahi kia Kiunke bohut books ko
roman Kia gaya un sab**

**ko Check karna asan nahi, time ka
commitment deegar Urdu books Aur syllabus
par laga huva hai is liye badi**

**mazirat ke sat arz hai ke jahan kahin apko
pronunciation ya talaffuz mai Diqqat lage
Urdu Janne Waloun se**

**asal Kitab ki taraf rujoo farmaen in sha
Allaah in sha Allaaah**

**Askislampedia ki Team ka shukriya ke Roman
mai book lane mai madad faramee**

Khas tour se

**Riaz bhai , shaikh abdullah Umeri, faheem
iqbal , Mushtaq ahmed Aur baz sisters bhi
hain jo madad kie Aur**

**kuch brothers bhi madad kie Likin ijazat nahi
hai ke unka naam zikr Kia jae Allaah qabool
farmae sab ki mahant**

Ameen

Shukriya

Shoba e nashro ishaat,

Askislampedia

SHAB E MERAJ ME KYA HUA?

Tamheed

Isra ka matlab

Meraj ka matlab

Quraan Majeed me isra ka zikr

Quraan Majeed me meraj ka zikr

Aap ﷺ ko meraj kitni martaba naaseeb huyi?

Isra aur meraj ka waaqi'ah

Aap ﷺ ke meraj ke mauqe par teen cheezen ata kee gayi

Aap ﷺ ka meraj ke mauqe par qabr ke manazir dekhna

Isra wa meraj ke kuch aham paighaamaat

Ghaib ki baaten na maanne waalon ke aqli dalayel aur unka jawaab

Tamheed

Allaah Taala ne Nabi Kareem ﷺ ko kayi mu'ajize ata kiye the, unme se ek raat me Aap ﷺ ko isra aur meraj karwaana bhi hai, jiska zikr Quraan aur Sahi Ahadees me maujood hai aur is par eemaan rakhna har musalmaan par laazmi aur zaroori hai.

“Isra” ka matlab :

Isra ka matlab hai Nbi Kareem ﷺ ka raat ke kuch hisse me makkah se baitul maqdis ko jaana.

“Meraj” ka matlab :

Lafz e meraj urooj se nikla hai. maf'aal ke wazan par jiske maani hai vo Ilah jiske zariye oopar chadha jaata hai jisko ham seedhi kahte hai aur iska shara'i matlab hai. Nabi Kareem ﷺ ka raat ke kuch hisse me baitul maqdis se aasmaan ki taraf jaana aur saaton aasmaano ki sair karna.

Quraan Majeed me isra ka zikr :

Allaah Taala ne Surah Isra me isra ka zikr karte huye farmaya :

“SUBHAA NALLAZEE ASRAA BI ABDIHI LAILAM MINAL MASJIDIL HARAAMI ILAL MASJIDIL AQSALLAZEE BAARAKNAA HAW LAHU LINURIYAHU MIN AAYAATINAA INNAHU HUWAS SAMEE'UL BASEER)

Tarjamah : “Paak hai vo Allaah Taala jo apne bande ko raat hi raat me Masjid Haraam se Masjid Aqsa tak le gaya, jiske aas paas hamne barkat de rakhi hai, isliye ke ham use apni qudrat ke baaz namoone dikhaye, yaqeenan Allaah Taala hi khoob sunne dekhne waala hai.” (Surah Isra:17/1)

Quraan Majeed me meraj ka zikr :

Allaah Taala ne Surah Najm me meraj ka zikr karte huye farmaya :

**(ALLAMAHOO SHADEEDUL QUWAA. ZOO MIRRATIN FASTAWAA.
WAHUWA BIL UFUQIL A'LAA. SUMMA DANAA FATADALLAA.
FAKAANA QAABA QAWSAINI AW ADNAA. FA AW HAA ILAA ABDIHI
MAA AWHAA. MAA KAZABAL FU'AADU MAA RA AA.
AFATUMAAROO NAHU 'ALAA MAA YARAA. WALAQAD RA AAHU
NAZLATAN UKHRAA. INDA SIDRATIL MUNTAHAA)**

Tarjamah : “Ise poori taaqat waale farishte ne sikhaaya hai. Jo zor aawar hai phir vo seedha khada ho gaya. Aur vo buland aasmaan ke kinaaron par tha phir nazdeek hua aur utar aaya. Pas vo do kamaano ke ba qadar faasla rah gaya balke us se bhi kam. Pas usne Allaah ke bande ko vahee pahunchaayi jo bhi pahunchaayi. Dil ne jhoot nahi kaha jise (Paighambar ne) dekha. Kya tum jhagda karte ho us par jo (Paighambar) dekhte hai, haalaan ke bila shubah yaqeenan usne use ek aur baar utarte huye bhi dekha hai. Aakhri had ki beeri ke paas.” (Surah Najm:53/5-14)

Aap ﷺ ko meraj kitni martaba naseeb huyi? :

Quraan wa Sahi Ahadees ka mut'aalla karne se pata chalta hai ke Aap ﷺ ko “meraj” ek martaba karayi gayi jo haalat bedaari me rooh aur jism ke saath tha. Surah Isra me Rabbul Aalameen ne farmaya **(SUBHAA NALLAZEE ASRAA BI ABDIH)** abd ka lafz jism aur rooh ke majmu'e se ta'abeer hai aur tamaam Sahaba Kraam aur salaf saaliheen ka yahi mauqif tha. Ahadees Saheeha ke mut'aalle se bhi yahi baat maaloom hoti hai ke Aap ﷺ ko jism aur rooh ke saath meraj ki sair karwaayi gayi thi.

Aur khwaab ke zariye mukhtalif mauqon par jannat aur jahannam ke manazir dekhenge jiska zikr kutub Ahadees me milta hai aur Imam Bukhari Rahimahullah ne apni Sahi (Sahi Bukhari) ‘kitab al rawya’ yaani “Book of Dreams” me baaz Ahadees ko zikr kiya hai. Anbiya ke khwaab sach hote hai aur un par yaqeen karna hamara deeni fareeza hai.

Isra aur Meraj ka waaqi'ah :

Zer nazar sutoor me qaa'een ki khidmat me waaqi'ah “Isra” aur “Meraj” ka ek ijmaali khaaka rakhne ki ek talab ilmaanah si koshish hai, ke ye waaqi'ah apne mauzoo aur mahtoyaati wa juzyaati ke sabab ek tafseeli mauzoo hai, raaqim sutoor ki koshish ye hogi ke is waaqiye ke tazkire ke saath saath us se haasil hone waale asbaaq wa duroos ka bhi ishaarah hasbe zaroorat zikr ho, In Sha Allaah.

Jis saal Nabi Kareem ﷺ ko isra aur meraj naseeb huyi, is saal Nabi Kareem ﷺ ke chacha ka inteqaal hua jo ke Nabi Kareem ﷺ ko bahut zyada azeed rakha karte the, neez chacha Abu Talib ne umar bhar Aap ki har tarah se madad kee aur dushmanaane Islam ke muqabil Aap ke aage chattan ki tarah khade rahe. Abhi chacha ki wafaat ka zakhm sookha bhi nahi tha ke Aap ﷺ ki pyaari aur chaheeti biwi Hazrat Khadijah Raziallahuanha ka inteqaal ho gaya. In dono sadmo ne Aap ﷺ ke dil par bada gahra asar choda, Aap ﷺ gham me doob gaye.

Jab Aap ﷺ ke dono muhsin is daare faani se kooch kar gaye to kuffar quraish Aap ko bahut sataane lage aur Aap ﷺ ko ab har choti takleef bhi badi lagne lagi, chuna che Allaah Taala ne apne mahboob ko tasalli dene ke liye apne haan bulaane ka intezaam farmaya.

Hazrat Anas Raziallahuanhu farmaate hai ke Abu Zar Raziallahuanhu farma rahe the ke Nabi Kareem ﷺ ne farmaya : Ek martaba mai makkah tul mukarramah me aaraam kar raha tha to ghar ki chat phat padi, Jibreel Alaihissalaam utre aur mera seena chaak kiya, (aaj ke daur me ye baat samajhna mushkil nahi kyu ke aaj bade bade dil ke operation badi aasaani ke saath ho raahe hai), phir use zam zam ke paani se dhoya, ek sone ka tasht laaye jo eemaan aur hikmat ki baaton se bhara hua tha aur isko mere seene me rakh kar use jod diya. Phir Jibreel baraaq ke zariye mujhe baitul maqdis le gaye. Baraaq ye gadhe se bada aur khachchar se chota jaanwar hai aur uski ek chalaang insaan ke nigah ki aakhri had tak hoti hai. Bahar kaif Aap ﷺ Jibreel Alaihissalaam ke ma'eet me baitul maqdis jaate hai aur jahaan deegar Anbiya apni sawaariyaan baandhte the, vahee baraaq ko bhi baandh dete hai, phir masjid aqsa me daakhil hokar do rakaat padhi aur isme Anbiya ki imamat farmayi. Phir Aap ﷺ ke paas teen bartan laaye jaate hai, ek me sharaab doosre me doodh aur teesre me shahad hota hai. Aap ﷺ doodh ko pasand farmaate hai is par Hazrat Jibreel Alaihissalaam farmaate hai, Aap ﷺ ne fitrat paayi, Aap ne aur Aap ki ummat ki hidaayat naseeb huyi agar Aap sharaab ko pasand farmaate to Aap ki ummat gumraah ho jaati.

Iske baad Aap ko baitul maqdis se aasmaan ki taraf le jaaya jaata hai, jab vo pahle aasmaan par pahunche to Jibreel ne kaha ke darwaaza kholo, aasmaan ke daarogha ne poocha, aap koun hai? (Is se maaloom hua ke aasmaan ke darwaaze hai aur ghaib ka ilm farishton ko bhi nahi hai) Jibreel Alaihissalaam ne jawaab diya ke mai jibreel hoon, phir usne poocha ke aap ke saath koun hai? Jibreel Alaihissalaam ne kaha ke mere saath Muhammad ﷺ hai, phir usne Jibreel Alaihissalaam se poocha ke kya aap ko unhe laane ke liye bheja gaya tha? Jibreel Alaihissalaam ne kaha ke haan phir uske baad farishte ne marhaba kaha aur aasmaan ka darwaaza khola gaya aur ham usme chadh gaye.

Ghour keejiye isme kis tarah ka discipline follow kiya jaa raha hai. Jibreel Alaihissalaam ne bhi aur aasmaan ke darogha ne bhi discipline ko follow kiya, man maani nahi kiya. Is kaaynaat me siwaaye insaano ke tamaam makhlooqaat discipline ko follow karte hai, lekin insaan aur jinnaat ko jab thodi aazaadi milti hai to vo sharaaraton par utarte hai.

Pahle aasmaan par ek aadmi se mulaqaat hoti hai, Aap ne unhe salaam kiya unhone salaam ka jawaab diya marhaba kaha aur Aap ki nabuwwat ka iqraar kiya. Aap ﷺ ne dekha ke unke daayen jaanib kayi bade khoobsoorat chehre the jab vo unhe dekhte hai to muskuraate hai. aur unke baayen jaanib kayi kaale badsoorat the. Aap ﷺ ne Jibreel Alaihissalaam se poocha ke kaun hai? Jibreel Alaihissalaam ne kaha ye Aadam Alaihissalaam hai, unke daayen jaanib ahle jannat ki roohen hai aur unke baayen jaanib ahle jahannam ki roohen hai. (Is se maaloom hua ke Aap ﷺ ko ghaib ka ilm nahi tha)/

Ek shubah aur uska izaalah :

Baaz log ye sawaal karte hai ke logon ki jannat aur jahannam pahle hi se tai hai to ham amal kyu karen?

Iska jawaab vahee hai jo Nabi Kareem ﷺ ne diya tha :

عَنْ عَلِيِّ رَضِيَ اللَّهُ عَنْهُ، قَالَ: كَانَ النَّبِيُّ صَلَّى اللَّهُ عَلَيْهِ وَسَلَّمَ فِي جَنَازَةٍ، فَأَخَذَ شَيْئًا فَجَعَلَ يَنْكُتُ بِهِ الْأَرْضَ، فَقَالَ: "مَا مِنْكُمْ مِنْ أَحَدٍ إِلَّا وَقَدْ كُتِبَ مَقْعَدُهُ مِنَ النَّارِ، وَمَقْعَدُهُ مِنَ الْجَنَّةِ"، قَالُوا: يَا رَسُولَ اللَّهِ، أَفَلَا نَتَّكِلُ عَلَى كِتَابِنَا وَنَدْعُ الْعَمَلَ؟ قَالَ: "اعْمَلُوا فَكُلُّ مُيَسَّرٍ لِمَا خُلِقَ لَهُ، أَمَّا مَنْ كَانَ مِنْ أَهْلِ السَّعَادَةِ، فَيُيَسَّرُ لِعَمَلِ أَهْلِ السَّعَادَةِ، وَأَمَّا مَنْ كَانَ مِنْ أَهْلِ الشَّقَاءِ فَيُيَسَّرُ لِعَمَلِ أَهْلِ الشَّقَاوَةِ، ثُمَّ قَرَأَ فَأَمَّا مَنْ أُعْطِيَ وَاتَّقَى {5} وَصَدَّقَ بِالْحُسْنَى {6} سورة الليل آية 5-6 الآية."

Tarjamah : “Ali Raziallahuanhu ne bayaan kiya ke Nabi Kareem ﷺ ek janaze me tashreef rakhte the. Phir Aap ﷺ ne ek cheez lee aur us se zameen khareedne lage aur farmaya, tum me se koyi aisa shakhs nahi jiska jahannam ka thikaana ya jannat ka thikaana likha na jaa chuka ho. Sahaba ne arz kiya, ke Yaa Rasoolullah ! To phir ham kyu apni taqdeer par bharosa na karle aur nek amal karna chod de. Nabi Kareem ﷺ ne farmaya ke, nek amal karo, har shakhs ko in aamaal ki tawfeeq dee jaati hai jinke liye vo paida kiya gaya hai, jo shakhs nek hoga use nekiyon ke amal ki tawfeeq mili hoti hai aur jo bad bakht hota hai use badbakhton ke amal ki tawfeeq milti hai phir Aap ﷺ n aayat “FA AMA MAN AATAA WA ATQAA, WA SADAQA BIL HASANI” aakhir tak padhi yaani “so jisne diya aur Allaah se dara aur achchi baat ko sachcha samjha, so ham uske liye nek amalon ko aasaan kar denge.” (Sahi Muslim:4949)

Lihaza taqdeer ka sahara museebaton me lenge na ke museebaton aur amal se jee churaane ke liye.

Uske baad Hazrat Jibreel Alaihissalaam Nabi Kareem ﷺ ko doosre aasmaan par le jaate hai aur yahaan vahee sawaalaat wa jawaabaat hote hai jo pahle aasmaan par huye the aur Hazrat Jibreel Alaihissalaam darwaaze khulwaate hai. Aur yahaan par Nabi Kareem ﷺ ki mulaaqaat do khaala zaad bhai Hazrat Yahya Alaihissalaam aur Hazrat Eesa Alaihissalaam se hoti hai. Aap ne unhe salaam kiya unhone salaam ka jawaab diya marhaba kaha aur Aap ki nabuwwat ka iqraar kiya.

Iske baad Hazrat Jibreel Alaihissalaam Nabi Kareem ﷺ ko teesre aasmaan par le jaate hai. Aur yahaan vahee sawaalaat wa jawaabaat hote hai aur Hazrat Jibreel Alaihissalaam darwaaze khulwaate hai. Aur yahaan par Nabi Kareem ﷺ ki mulaaqaat Hazrat Yusuf Alaihissalaam se hoti hai. Aap ne unhe salaam kiya unhone salaam ka jawaab diya marhaba kaha aur Aap ki nabuwwat ka iqraar kiya.

Iske baad Hazrat Jibreel Alaihissalaam Nabi Kareem ﷺ ko chawthe aasmaan par le jaate hai. Aur yahaan vahee sawaalaat wa jawaabaat hote hai aur Hazrat Jibreel Alaihissalaam darwaaze khulwaate hai. Aur yahaan par Nabi Kareem ﷺ ki mulaaqaat Hazrat Idrees Alaihissalaam se hoti hai. Aap ne unhe salaam kiya unhone salaam ka jawaab diya marhaba kaha aur Aap ki nabuwwat ka iqraar kiya.

Iske baad Hazrat Jibreel Alaihissalaam Nabi Kareem ﷺ ko paanchwen aasmaan par le jaate hai. Aur yahaan vahee sawaalaat wa jawaabaat hote hai aur Hazrat Jibreel Alaihissalaam darwaaze khulwaate hai. Aur yahaan par Nabi Kareem ﷺ ki mulaaqaat Hazrat Haroon Alaihissalaam se hoti hai. Aap ne unhe salaam kiya unhone salaam ka jawaab diya marhaba kaha aur Aap ki nabuwwat ka iqraar kiya.

Iske baad Hazrat Jibreel Alaihissalaam Nabi Kareem ﷺ ko chate aasmaan par le jaate hai. Aur yahaan vahee sawaalaat wa jawaabaat hote hai aur Hazrat Jibreel Alaihissalaam darwaaze khulwaate hai. Aur yahaan par Nabi Kareem ﷺ ki mulaaqaat Hazrat Moosa Alaihissalaam se hoti hai. Aap ne unhe salaam kiya unhone salaam ka jawaab diya marhaba kaha aur Aap ki nabuwwat ka iqraar kiya. Jab Aap wahaan se aage badhe to Moosa Alaihissalaam rone lage, jab unse wajah poochi gayi to unhone kaha ek naujawaan jo mere baad mab'oos kiya gaya lekin meri ummat se zyada uski ummat ke afraad jannat me daakhil honge.

Iske baad Hazrat Jibreel Alaihissalaam Nabi Kareem ﷺ ko saatwen aasmaan par le jaate hai. Aur yahaan vahee sawaalaat wa jawaabaat hote hai aur Hazrat

Jibreel Alaihissalaam darwaaze khulwaate hai. Aur yahaan par Nabi Kareem ﷺ ki mulaaqaat Hazrat Ibrahim Alaihissalaam se hoti hai. Aap ne unhe salaam kiya unhone salaam ka jawaab diya marhaba kaha aur Aap ki nabuwwat ka iqraar kiya. Vo apni peeth baitul ma'amoor se tek lagaye huye baithe huye the.

Baitul Ma'amoor kya hai? :

Baitul Ma'amoor Allaah Taala ka ek ghar hai jo saaton aasmano ke oopar hai. Jis tarah Kabatullah ke atraaf insaan aur jinnaat tawaaf karte hai usi tarah rozana sattar hazaar farishte baitul ma'amoor ki tawaaf karte hai. Jo ek martaba tawaaf karte hai dobara unhe tawaaf karne ka mauqa nahi milta hai. Jaisa ke Jibreel Alaihissalaam ne Aap ﷺ ke sawaal karne par kaha :

“hazaal baitul ma'amoor yusalli feehi kulla youmin sab'oona alfa malakin, iza kharajoo lam ya'oodoo ilaihi aakhira maa alaihim”

Tarjamah : “Ye baitul ma'amoor hai jisme rozana sattar hazaar farishte tawaaf karte hai agar koyi ek martaba us se nikal gaya to dobara uski baari nahi aati.” (Sahi ul Jaame:3207)

Allaah Taala ne Surah Toor me baitul ma'amoor ki qasam khaayi hai :

(WAL BAITIL MA'AMoor)

Tarjamah : “Qasam hai aabaad ghar ki.” (Surah Toor:52/4)

Phir Aap ﷺ ko wahaan se “sidratul muntahaa” tak le jaaya jaata hai yaani beeri ka darakht. Jiske patte haathi ke kaan aur phal matke aur drum ke barabar the, aur is par sone ke patinge baith kar Allaah ki hamd wa sana bayaan kar rahi thi.

Phir uske baad thoda aage badh kar Hazrat Jibreel Alaihissalaam ruk jaate hai aur Nabi Akram ﷺ se kahte hai ke meri had yahee tak thi, Aap aage badhiye, Aap ﷺ aage badhte hai (is se hame Aap ﷺ ke maqaam wa martabe ka ilm hota hai. Lekin yahaan par kuch log man gadhat aur jhoote qisse gadh kar kahte hai ke yahaan par Allaah Taala aur Nabi Kareem ﷺ ek hote hai to Aap ﷺ ko apne paas bulaane ki zaroorat hi nahi thi).

Aap ﷺ ko meraj ke mauqe par teen cheezen ata kee gayi :

Meraj ke waqt Aap ﷺ ko teen cheezen ata kee gayi : (1) Pahli cheez : Pachaas namazen ata kee. (2) Doosri cheez : Surah Baqarah ki aakhri do aayaat. Quraan Majeed poora zameen par naazil hua lekin ye do aayaat aisi hai jo zameen par bhi naazil huyi aur meraj ke waqt bhi dee gayi. (3) Teesri cheez : Mawhid ke liye maghfirat ki khush khabri.

Aap ﷺ ye teeno cheezen lekar waapis aa rahe the phir chate aasmaan par Aap ki mulaqaat Hazrat Moosa Alaihissalaam se hui to unhone poocha ke Aap ke Rab ne Aap ko kis cheez ka hukum diya? Aap ne saari cheezen batayi us par Moosa Alaihissalaam ne kaha, Aap apne Rab ke paas jaa'ie aur namazon me takhfeef karwaa'ie. Aap ﷺ Allaah ke darbaar me pahunche aur namazon me takhfeef ki darkhwaast kee to Allaah Taala ne das namazen kam kar dee. Phir Aap ﷺ chaalis namazen lekar Moosa Alaihissalaam ke paas se guzre to unhe aur takhfeef karwaane ka hukum diya phir Aap ﷺ Allaah ke darbaar me pahunche aur namazon me takhfeef ki darkhwaast kee to Allaah ne aur das namazen kam kar dee. Yahee silsila chalta raha yahaan tak ke paanch namazon tak takhfeef kee gayi. Phir jab Aap Moosa Alaihissalaam ke paas se guzre to unhone aur takhfeef karwaane ka mashwarah diya aur kaha meri ummat bani israa'eel par is se bhi kam namazen farz kee gayi thi, lekin vo usko bhi ada karne se qaasir rahi. Is par Aap ﷺ ne farmaya : Ab mujhe sharm aa rahi hai mai isi par raazi hoon. Jab Aap ﷺ kuch aage badhe to nida aayi ke maine apna fareeza naafiz kar diya, vo paanch namazen sawaab me pachaas ke barabar hai, mere nazdeek baat nahi badli jaati.” (Sahi Bukhari:349/1636/3207/3342/3392/3430/3887/4709/7517)

Namazon se musalmaano ki ghaflat :

Namaz deene Islam ka doosra aur aham rukun hai, lekin musalmaan iske taalluq se kaafi ghaflat ka shikaar hai. Masjiden namazon ke baghair veeraan hai. Fajr ke waqt saare musalmaano ke ghar qabrastaan numa dikhayi dete hai. Aur bahut saari aisi bhi masjid hai jahaan sirf imam aur mu'azzin hi fajr ki namaz padh kar nikal jaate hai. Wahaan koyi teesra maujood nahi hota hai. Ham musalmaan zuhar ke waqt kaam, asr khel kood, maghrib ka waqt office ke kaam aur isha ka waqt aaraam guzaar dete hai aur sitam zareefi ye ke ham eidain ke mauqe par is jagah ka intekhaab karte hai jahaan namaz der se ada kee jaati hai.

Bahar kaif Nabi Kareem ﷺ ne subah apni qoum waalon ko isra aur meraj ki saari tafseelaat bataaya to kuffar makkah Aap ka mazaaq udaane lage aur ta'ajjub ka izhaar karne lage, kuch log Hazrat Abu Bakr Raziallahuanhu ke paas aaye aur unhe is baat ki khabar dee to unhone kaha, agar Aap ﷺ ne ye kaha hai to vo sach hai. Kaha jaata hai ke isi tasdeeq ki wajah se Aap Raziallahuanhu ka laqab siddeeq pada.

Kisi shaayar ne kya hi khoob kaha hai ;

Gul ke liye gulistaan bulbul ke liye phool bas

Siddiq ke liye Allaah aur uska Rasool bas

Iske baad log Aap ka imtehaan lete hai aur kahte hai baitul maqdis ke awsaaf batayen. Allaah Taala baitul maqdis ki tasweer Aap ke saamne rakh dete hai aur Aap ﷺ baitul maqdis ki ek ek cheez bata dete hai is par kuffar kahte hai Aap ne baitul maqdis ke awsaaf ko theek theek bayaan kar diya.

Agar koyi Abu Bakr Siddiq Raziallahuanhu ki tarah hota hai to dekhte hi fauran "AAMANNA WA SADAQTANA" kahta . Bahar kaif ham Hazrat Abu Bakr Raziallahuanhu ki tarah apni taaqat salaahiyat ilm maal waghairah ke zariye Islam ki nashr wa ishaat ki koshish kare.

Azaabe qabr ke manazir ko dekhna :

Nabi Kareem ﷺ ko meraj ke mauqe par jannat aur jahannam ke kayi manazir dikhaye gaye, jaisa ke Sahi Bukhari ki "kitab al rawyaa" Book of dreams me mazkoor hai :

عن سَمُرَةَ بْنِ جُنْدُبٍ رَضِيَ اللَّهُ عَنْهُ، قَالَ: كَانَ رَسُولُ اللَّهِ صَلَّى اللَّهُ عَلَيْهِ وَسَلَّمَ مِمَّا يُكْثِرُ أَنْ يَقُولَ لِأَصْحَابِهِ: «هَلْ رَأَى أَحَدٌ مِنْكُمْ مِنْ رُؤْيَا» قَالَ: فَيَقْصُّ عَلَيْهِ مَنْ شَاءَ اللَّهُ أَنْ يَقْصَّ، وَإِنَّهُ قَالَ ذَاتَ غَدَاةٍ: «إِنَّهُ أَتَانِي اللَّيْلَةُ آتِيَانِ، وَإِنَّهُمَا ابْتَعَثَانِي، وَإِنَّهُمَا قَالَا لِي أَنْطَلِقْ، وَإِنِّي أَنْطَلَقْتُ مَعَهُمَا، وَإِنَّا أَتَيْنَا عَلَى رَجُلٍ مُضْطَجِعٍ، وَإِذَا آخِرُ قَائِمٍ عَلَيْهِ بِصَخْرَةٍ، وَإِذَا هُوَ يَهْوِي بِالصَّخْرَةِ لِرَأْسِهِ فَيَتَلَعُ رَأْسَهُ، فَيَتَذَهَّدُ الْحَجَرُ هَا هُنَا، فَيَتَّبِعُ الْحَجَرُ فَيَأْخُذُهُ، فَلَا يَرْجِعُ إِلَيْهِ حَتَّى يَصِحَّ رَأْسُهُ كَمَا كَانَ، ثُمَّ يَعُودُ عَلَيْهِ فَيَفْعَلُ بِهِ مِثْلَ مَا فَعَلَ الْمَرَّةَ الْأُولَى» قَالَ: " قُلْتُ لَهُمَا: سُبْحَانَ اللَّهِ مَا هَذَا؟ " قَالَ: " قَالَا لِي: أَنْطَلِقْ أَنْطَلِقْ " قَالَ: " فَأَنْطَلَقْنَا، فَأَتَيْنَا عَلَى رَجُلٍ مُسْتَلْقٍ لِقَفَاهُ، وَإِذَا آخِرُ قَائِمٍ عَلَيْهِ بِكَلُوبٍ مِنْ حَدِيدٍ، وَإِذَا هُوَ يَأْتِي أَحَدَ شَقِيٍّ وَجْهَهُ فَيَشْرِشِرُ شِدْقَهُ إِلَى قَفَاهُ، وَمَنْخَرَهُ إِلَى قَفَاهُ، وَعَيْنَهُ إِلَى قَفَاهُ، - قَالَ: وَرُبَّمَا قَالَ أَبُو رَجَاءٍ: فَيَشْتَقُ - " قَالَ: «ثُمَّ يَتَحَوَّلُ إِلَى الْجَانِبِ الْآخِرِ فَيَفْعَلُ بِهِ مِثْلَ مَا فَعَلَ بِالْجَانِبِ الْأَوَّلِ، فَمَا يَفْرُغُ مِنْ ذَلِكَ الْجَانِبِ حَتَّى يَصِحَّ ذَلِكَ الْجَانِبُ كَمَا كَانَ، ثُمَّ يَعُودُ عَلَيْهِ فَيَفْعَلُ مِثْلَ مَا فَعَلَ الْمَرَّةَ الْأُولَى» قَالَ: " قُلْتُ: سُبْحَانَ اللَّهِ مَا هَذَا؟ " قَالَ: " قَالَا لِي: أَنْطَلِقْ أَنْطَلِقْ، فَأَنْطَلَقْنَا، فَأَتَيْنَا عَلَى مِثْلِ النَّتُورِ - قَالَ: فَأَحْسِبُ أَنَّهُ كَانَ يَقُولُ - فَإِذَا فِيهِ لَعَطٌ وَأَصْوَاتٌ " قَالَ: «فَاطْلَعْنَا فِيهِ، فَإِذَا فِيهِ رَجَالٌ وَنِسَاءٌ عُرَاةٌ، وَإِذَا هُمْ يَأْتِيهِمْ لَهَبٌ مِنْ أَسْفَلٍ مِنْهُمْ، فَإِذَا أَتَاهُمْ ذَلِكَ اللَّهَبُ ضَوْضُوا» قَالَ: " قُلْتُ لَهُمَا: مَا هُوَ؟ " قَالَ: " قَالَا لِي: أَنْطَلِقْ أَنْطَلِقْ " قَالَ: «فَأَنْطَلَقْنَا، فَأَتَيْنَا عَلَى نَهْرٍ - حَسِبْتُ أَنَّهُ كَانَ [ص:45] يَقُولُ - أَحْمَرُ مِثْلَ الدَّمِ، وَإِذَا فِي النَّهْرِ رَجُلٌ سَابِحٌ يَسْبَحُ، وَإِذَا عَلَى شَطِّ النَّهْرِ رَجُلٌ قَدْ جَمَعَ عِنْدَهُ حِجَارَةٌ كَثِيرَةٌ، وَإِذَا ذَلِكَ السَّابِحُ يَسْبَحُ مَا يَسْبَحُ، ثُمَّ يَأْتِي ذَلِكَ الَّذِي قَدْ جَمَعَ عِنْدَهُ الْحِجَارَةَ، فَيَفْعَرُ لَهُ فَاهُ فَيُلْقِمُهُ حَجَرًا فَيَنْطَلِقُ يَسْبَحُ، ثُمَّ يَرْجِعُ إِلَيْهِ كُلَّمَا رَجَعَ إِلَيْهِ فَعَرَّ لَهُ فَاهُ فَالْقِمَهُ حَجَرًا» قَالَ: " قُلْتُ لَهُمَا: مَا هَذَا؟ " قَالَ: " قَالَا لِي: أَنْطَلِقْ أَنْطَلِقْ " قَالَ: «فَأَنْطَلَقْنَا، فَأَتَيْنَا عَلَى رَجُلٍ كَرِيهِهِ الْمَرَاةَ، كَأَكْرَهَ مَا أَنْتَ رَاءِ رَجُلًا مَرَاةً، وَإِذَا عِنْدَهُ نَارٌ يَحْشُهَا وَيَسْعَى حَوْلَهَا» قَالَ: " قُلْتُ لَهُمَا: مَا هَذَا؟ " قَالَ: " قَالَا لِي: أَنْطَلِقْ أَنْطَلِقْ، فَأَنْطَلَقْنَا، فَأَتَيْنَا عَلَى رَوْضَةٍ مُعْتَمَةٍ، فِيهَا مِنْ كُلِّ لَوْنٍ الرَّبِيعُ، وَإِذَا بَيْنَ ظَهْرِي الرَّوْضَةِ رَجُلٌ طَوِيلٌ، لَا أَكَادُ أَرَى رَأْسَهُ طَوْلًا فِي السَّمَاءِ، وَإِذَا حَوْلَ الرَّجُلِ مِنْ أَكْثَرِ وَلَدَانٍ رَأَيْتُهُمْ قَطُّ " قَالَ: " قُلْتُ لَهُمَا: مَا هَذَا

مَا هَؤُلَاءِ؟ " قَالَ: " قَالَا لِي: انْطَلِقْ انْطَلِقْ " قَالَ: «فَانْطَلَقْنَا فَاَنْتَهَيْنَا اِلَى رَوْضَةٍ عَظِيمَةٍ، لَمْ اَر رَوْضَةً قَطُّ اَعْظَمَ مِنْهَا وَلَا اَحْسَنَ» قَالَ: " قَالَا لِي: اِرْقَ فِيهَا " قَالَ: «فَارْتَقَيْنَا فِيهَا، فَاَنْتَهَيْنَا اِلَى مَدِينَةٍ مَبْنِيَّةٍ بِلَبْنٍ ذَهَبٍ وَلَبْنٍ فَضَّةٍ، فَاتَيْنَا بَابَ الْمَدِينَةِ فَاسْتَفْتَحْنَا فَفُتِحَ لَنَا فَدَخَلْنَاهَا، فَتَلَقَّانَا فِيهَا رَجَالٌ شَطْرَ مَنْ خَلَفَهُمْ كَاَحْسَنَ مَا اَنْتَ رَاءِ، وَشَطْرَ كَاَقْبَحَ مَا اَنْتَ رَاءِ» قَالَ: " قَالَا لَهُمْ: اَذْهَبُوا فَقَعُوا فِي ذَلِكَ النَّهْرِ " قَالَ: «وَإِذَا نَهَرَ مُعْتَرِضٌ يَجْرِي كَأَنَّ مَاءَهُ الْمَحْضُ فِي الْبَيَاضِ، فَذْهَبُوا فَوْقَهُوا فِيهِ، ثُمَّ رَجِعُوا إِلَيْنَا قَدْ ذَهَبَ ذَلِكَ السُّوءُ عَنْهُمْ، فَصَارُوا فِي أَحْسَنِ صُورَةٍ» قَالَ: " قَالَا لِي: هَذِهِ جَنَّةٌ عَدْنٌ وَهَذَاكَ مَنْزِلُكَ " قَالَ: «فَسَمَا بَصْرِي صُعْدًا فَإِذَا قَصْرٌ مِثْلُ الرَّيَابَةِ الْبَيْضَاءِ» قَالَ: " قَالَا لِي: هَذَاكَ مَنْزِلُكَ " قَالَ: " قُلْتُ لَهُمَا: بَارَكَ اللَّهُ فِيكَمَا ذَرَانِي فَأَدْخُلْهُ، قَالَا: أَمَّا الْآنَ فَلَا، وَأَنْتَ دَاخِلُهُ " قَالَ: " قُلْتُ لَهُمَا: فَأَيُّ قَدْ رَأَيْتَ مِنْذُ اللَّيْلَةِ عَجَبًا، فَمَا هَذَا الَّذِي رَأَيْتَ؟ " قَالَ: " قَالَا لِي: أَمَّا أَنَا سَنُخْبِرُكَ، أَمَّا الرَّجُلُ الْأَوَّلُ الَّذِي أَتَيْتَ عَلَيْهِ يُثَلِّغُ رَأْسَهُ بِالْحَجَرِ، فَإِنَّهُ الرَّجُلُ يَأْخُذُ الْقُرْآنَ فَيَرْفُضُهُ وَيَنَامُ عَنِ الصَّلَاةِ الْمَكْتُوبَةِ، وَأَمَّا الرَّجُلُ الَّذِي أَتَيْتَ عَلَيْهِ، يُشْرِشِرُ شِدْقَهُ إِلَى قَفَاهُ، وَمَنْخَرُهُ إِلَى قَفَاهُ، وَعَيْنُهُ إِلَى قَفَاهُ، فَإِنَّهُ الرَّجُلُ يَعْدُو مِنْ بَيْتِهِ، فَيَكْذِبُ الْكَذْبَةَ تَبْلُغُ الْآفَاقَ، وَأَمَّا الرَّجُلُ وَالنِّسَاءُ الْعُرَاةُ الَّذِينَ فِي مِثْلِ بِنَاءِ التَّنُّورِ، فَإِنَّهُمْ الزُّنَاةُ وَالزَّوَانِي، وَأَمَّا الرَّجُلُ الَّذِي أَتَيْتَ عَلَيْهِ يَسْبَحُ فِي النَّهْرِ وَيُلْقِمُ الْحَجَرَ، فَإِنَّهُ أَكَلَ الرَّبَا، وَأَمَّا الرَّجُلُ الْكَرِيمُ الْمَرَاةَ، الَّذِي عِنْدَ النَّارِ يَحْشُشُهَا وَيَسْعَى حَوْلَهَا، فَإِنَّهُ مَالِكٌ خَازِنُ جَهَنَّمَ، وَأَمَّا الرَّجُلُ الطَّوِيلُ [ص:46] الَّذِي فِي الرُّوضَةِ فَإِنَّهُ إِبْرَاهِيمُ صَلَّى اللَّهُ عَلَيْهِ وَسَلَّمَ، وَأَمَّا الْوُلْدَانُ الَّذِينَ حَوْلَهُ فَكُلُّ مَوْلُودٍ مَاتَ عَلَى الْفِطْرَةِ " قَالَ: فَقَالَ بَعْضُ الْمُسْلِمِينَ: يَا رَسُولَ اللَّهِ، وَأَوْلَادُ الْمُشْرِكِينَ؟ فَقَالَ رَسُولُ اللَّهِ صَلَّى اللَّهُ عَلَيْهِ وَسَلَّمَ: «وَأَوْلَادُ الْمُشْرِكِينَ، وَأَمَّا الْقَوْمُ الَّذِينَ كَانُوا شَطْرَ مَنْهُمْ حَسَنًا وَشَطْرَ قَبِيحًا، فَإِنَّهُمْ قَوْمٌ خَلَطُوا عَمَلًا صَالِحًا وَآخَرَ سَيِّئًا، تَجَاوَزَ اللَّهُ عَنْهُمْ»

Tarjamah : “Hazrat Samrah bin Jundub Raziallahuanhu se marwi hai, vo farmaate hai ke, Rasoolullah ﷺ jo baaten Sahaba Kraam se aksar kiya karte the unme se ye bhi hai ke, Aap ﷺ Sahaba se poochte tum me se kisi ne koyi khwaab dekha hai? Phir jo chahta apna khwaab Nabi Kareem ﷺ se bayaan karta aur Nabi Kareem ﷺ ne ek subah ko farmaya ke, raat mere paas do aane waale aaye aur unhone mujhe uthaaya aur mujhse kaha ke hamare saath chalo, mai unke saath chal diya. Phir ham ek lete huye shakhs ke paas aaye jiske paas ek doosra shakhs paththar liye khada tha aur uske sar par paththar phenk kar maarta to uska sar us se phat jaata, paththar ludhak kar door chala jaata, lekin vo shakhs paththar ke peeche jaata aur use uthaa laata aur use lete huye shakhs tak pahunchne se pahle hi uska sar theek ho jaata jaisa ke pahle tha. Khada hua shakhs phir usi tarah paththar us par maarta aur vahee sooraten pesh aati jo pahle pesh aayi thi. Nabi Kareem ﷺ ne farmaya ke, maine un dono se poocha, Subhaanallah ye dono koun hai? Farmaya ke mujhse unhone kaha ke aage badho, aage badho. Farmaya ke kuch ham aage badhe aur ek aise shakhs ke paas pahunchne jo peeth ke bal leta hua tha aur ek doosra shakhs uske paas lohe ka aankda liye khada tha aur ye uske chehre ke ek taraf aata aur uske ek jabde

ko guddi tak cheerta aur uske naak ko guddi tak cheerta aur uski aankh ko guddi tak cheerta. (Awf ne) bayaan kiya ke baaz dafaa Abu Raja'a (raawi Hadees) ne "feeshq" kaha, (Rasoolullah ﷺ ne) bayaan kiya ke phir vo doosri jaanib jaata udhar bhi isi tarah cheerta jis tarah usne pahli jaanib kiya tha. Vo abhi doosri jaanib se faarigh bhi na hota tha ke pahli jaanib apni pahli sahi haalat me laut aati. Phir dobara vo isi tarah karta jis tarah usne pahli martaba kiya tha. (Is tarah barabar ho raha tha) farmaya ke maine kaha Subhaanallah ! Ye dono koun hai? Unhone kaha ke aage chalo, (abhi kuch na poocho) chunache ham aage chale, phir ham ek tanoor jaisi cheez par aaye. Raawi ne bayaan kiya ke mera khayaal hai ke Aap kaha karte the ke isme shor wa aawaaz thi. Kaha ke phir hamne usme jhaanka to uske andar kuch nange mard aur auraten thi aur unke neech se aag ki lapat aati thi, jab aag unhe apni lapet me leti to vo chillane lagte. (Rasoolullah ﷺ ne) farmaya ke maine unse poocha ye koun log hai. Unhone kaha ke chalo aage chalo. Farmaya ke ham aage badhe aur ek nahar par aaye. Mera khayaal hai ke Aap ne kaha ke vo khoon ki tarah surkh thi aur us nahar me ek shakhs teer raha tha aur nahar ke kinaare ek doosra shakhs tha jisne apne paas bahut se paththar jama kar rakhe the aur ye teerne waala teerta hua jab us shakhs ke paas pahunchta jisne paththar jama kar rakhe the to ye apna muh khol deta aur kinaare ka shakhs uske muh me paththar daal deta vo phir teerne lagta aur phir uske paas laut kar aata aur jab bhi uske paas aata to apna muh phaila deta aur ye uske muh me paththar daal deta. Farmaya ke maine poocha ye koun hai? Farmaya ke unhone kaha ke chalo aage chalo. Farmaya ke phir ham aage badhe aur ek nihaayat badsoorat aadmi ke paas pahunche jitne badsoorat tum ne dekhe honge unme sabse zyada badsoorat. Uske paas aag jal rahi thi aur vo use jala raha tha aur uske chaaron taraf daudta tha (Nabi ﷺ ne) farmaya ke maine unse kaha ke ye koun hai? Farmaya ke unhone mujh se kaha chalo aage chalo. Ham aage badhe aur ek aise baagh me pahunche jo hara bhara tha aur usme mausam bahaar ke sab phool the. Us baagh ke damiyaan me bahut lamba ek shakhs tha, itna lamba tha ke mere liye uska sar dekhna dushwaar tha ke vo aasmaan se baaten karta tha aur us shakhs ke chaaron taraf bahut se bachche the ke utne kabhi nahi dekhe the (Nabi Kareem ﷺ ne) farmaya ke maine poocha ye kaun hai, ye bachche koun hai? Farmaya ke unhone mujhse kaha ke chalo aage chalo. Farmaya ke phir ham aage badhe aur ek azeem o shaan baagh tak pahunche, maine itna bada aur khoobsoorat baagh kabhi nahi dekha tha. Un dono ne kaha ke is par chadhiye ham us par chadhe to ek aisa shahar dikhaayi diya jo is tarah bana tha ke uski ek eent sone ki thi aur ek eent chaandi ki. Ham shahar ke darwaaze par aaye to hamne use khulwaaya. Vo hamare liye khola gaya aur ham usme daakhil huye. Hamne usme aise logon se mulaqaat kee jinke jism ka nisf hissa to nihaayat khoobsoorat tha aur dosra nisf nihaayat badsoorat. (Nabi Kareem ﷺ ne) farmaya ke dono saathiyon ne un logon se kaha

ke jaa'o aur us nahar me kood jaa'o. Ek nahar saamne bah rahi thi uska paani intehaayi safed tha vo log gaye aur usme kood gaye aur phir hamare paas laut kar aaye to unka pahla aib jaa chuka tha aur ab vo nihaayat khoobsoorat ho gaye the (Nabi Kareem ﷺ ne) farmaya ke un dono ne kaha ke ye jannat and hai aur ye Aap ki manzil hai. (Nabi Kareem ﷺ ne) farmaya ke meri nazar oopar ki taraf uthi to safed baadal ki tarah ek mahal oopar nazar aaya, farmaya ke unhone mujhse kaha ke ye Aap ki manzil hai. Farmaya ke maine unse kaha Allaah Taala tumhe barkat de. Mujhe isme daakhil hone do. Unhone kaha ke is waqt to Aap nahi jaa sakte lekin haan Aap isme zaroor jaayenge. Farmaya ke maine unse kaha ke aaj raat maine ajeeb wa ghareeb cheezen dekhi hai. Ye cheezen kya thi jo maine dekhi hai. Farmaya ke unhone mujhse kaha, ham Aap ko batayenge. Pahla shakhs jiske paas Aap gaye the aur jiska sar paththar se kuchla jaa raha tha ye vo shakhs hai jo Quraan seekhta tha aur phir use chod deta aur farz namaz ko chod kar so jaata aur vo shakhs jiske paas Aap gaye aur jiska jabda guddi tak aur naak guddi tak aur aankh guddi tak cheeri jaa rahi thi. Ye vo shakhs hai jo subah apne ghar se niklata aur jhooti khabar taraasta, jo dunya me phail jaati aur vo nange mard aur auraten jo tanoor me Aap ne dekha vo zina kaar mard aur auraten thi. Vo shakhs jiske paas Aap is haal me gaye ke vo nahar me teer raha tha aur uske muh me paththar diya jaata tha vo sood khaane waala hai aur vo shakhs jo badsoorat hai aur jahannam ki aag bhadka raha hai aur uske chaaron taraf chal phir raha hai vo jahannam ka daarogha maalik naami hai aur vo lamba shakhs jo baagh me nazar aaya vo Ibrahim Alaihissalaam hai aur jo bachche unke chaaron taraf hai to vo bachche hai jo (bachpan hi me) fitrat par mar gaye hai. Bayaan kiya ke is par baaz musalmaano ne kaha : Aye Allaah ke Rasool ! Kya mushrikeen ke bachche bhi unme daakhil hai? Nabi Kareem ﷺ ne farmaya ke, haan mushrikeen ke bachche bhi (inme daakhil hai) ab rahe vo log jinka aadha jism khoobsoorat aur aadha badsoorat tha to ye vo log the jinhe ne achche amal ke saath bure amal bhi kiye, Allaah Taala unke gunahon ko bakhsh diya. (Sahi Bukhari:7047)

Isra aur meraj ke kuch aham paighaamaat :

Isra aur meraj ka waaqiye se hame kayi aham asbaaq milte hai inme se kuch ye hai :

- (1) Azaabe jahannam aur azaabe qabr ko hamesha dilon me taaza rakhna, (2) Namazon ka ahtemaam karna, (3) Shirk wa bid'at aur see'aat se mahfooz rahna aur (4) Surah Baqarah ke aakhri do aayatun ki tilawat ka ahtemaam karna waghairah.

Aap ﷺ ko isra aur meraj karaaya gaya isme zarra barabar bhi shak ki gunja'ish nahi hai ye har momin ka eemaan wa yaqeen hai lekin baaz kuch aql parast

eemaan bil ghaib ki cheezon ka inkaar karte hain ur uske liye kayi kamzor aqli dalayel pesh karte hai. In Sha Allaah mai inka tasalli bakhsh jawaab doonga.

Ghaib ki baaten na maanne waalon ke aqli dalayel aur unka jawaab

Pahli daleel aur uska jawaab :

Baaz log ye kahte hai ke hame farishte nazar nahi aate hai to ham farishton ko nahi maante hai.

Iska jawaab ye hai insaani zindagi se taalluq rakhne waali bahut saari aisi cheezen jo nazar nahi aati phir bhi insaan unhe maanta hai misaal ke taur par aql insaan ko nazar nahi aati phir bhi insaan usko maanta hai. Hawa insaan ko nazar nahi aati phir bhi insaan hawa ke wajood ko tasleem karta hai. Isi tarah farishton ka maamla ho ya isra meraj agar hame kuch nazar na aata ho tab bhi hame maanna zaroori hai kyu ke Quraan wa Hadees ke andar iska zikr hai.

Doosri daleel aur uska jawaab :

Baaz log kahte hai ke jo cheez meri samajh me nahi aati mai use nahi maanta hoon.

Iska jawaab ye hai ke insaan utna hi samajhta hai jitni uski aqli salaahiyat hoti hai, dunya me bahut saari cheezen hai jo insaan ke samajh me nahi aati lekin phir bhi insaan unhe maanta hai.

Isi tarah kuch saal qabl koyi nahi maanta tha ke ek choti si naakhun ke barabar chip me ek bahut badi library aa sakti hai. Lekin aaj log ise tasleem karte hai. Har daur me insaano ki samajhne ki capacity alag alag hoti hai.

Inhi aham paighaamaat ke saath mai apni baat khatam karta hoon aur Allaah Taala se dua karta hoon ke Allaah Taala mujhe aur aap sab ko Quraan wa Hadees me gahraayi haasil karne ki tawfeeq ata farma, Aameen.

Note : Is khutbe ko video me dekhne aur sunne ke liye baraaye meherbaani neeche dee huyi link par jaa'iye :

<https://www.youtube.com/watch?v=XPp3FHh2ciY&index=4&list=PLPrhG3IHJvtuMTFgbD-TnfcVoeeaa8XLg>

